

皇明典故紀聞

皇明典故紀聞卷十四

交河 余繼登 緝

臨朐 馮琦 訂

新城 王象乾 校

○禮君喪三年不祭惟祭天地社稷越紼而行
事不敢以卑廢尊以已喪廢公祀也天順八
年正月

英宗崩 憲宗初卽位禮臣引此爲言謂春二
月祭 大社大稷請 上如禮行之釋奠

先師遣官如故但免傳制制曰可

○仕途之升沉其遲速自有定數非可因人而
僥倖也典璽丞王綸事

憲廟於東宮頗見幸希後福者遂多與之通侍
讀學士錢溥嘗教綸於內書館時尚寶丞朱
奎以幼童陪讀館中相親昵及

英廟不豫溥意綸必典機務密遣奎通綸綸卽
偕奎至溥家痛飲極歡而罷及

英廟崩溥預有人閣之喜綸亦以當柄用甚驕

恣遂爲司禮監太監牛玉所譖執下獄發南京諸與綸交通者皆得罪溥謫順德知縣奎鹽課提舉此可爲士君子妄交之戒

錦衣衛指揮門達機警有才幹然恃才使勢怙寵張威旣掌衛事乃建議遣校尉分行緝訪蒐求幽隱索取貨賄由是詐冒者接跡於途中外官僚重足而立天下騷然不安大學士李賢指揮袁彬亦幾爲所中傷天順七年十二月錦衣衛大門忽爲狂風所摧折衆謹

傳曰錦衣衛門倒矣纔兩月

憲廟立達爲科道所劾論斬詔戍廣西南丹衛而死人以爲先兆云

高廟嚴宮闈之慮 祖訓內明載寺觀燒香降香禳告之禁違者領送之人皆處死

憲廟初番僧有入內誦經者又左右有傳送銀物於寺觀者大學士李賢等指以爲言得旨卿等言是 祖訓具在敢不祇率

○初巡關御史有二員成化初御史張璿巡居

庸關至龍泉祝祥巡山海關至古北口
英廟天順八年正月崩梓宮尚在殯四月初
一日享太廟當奏祭祀禮部請上具黃
袍翼善冠陞殿鳴鍾鼓鳴鞭樂設而不作百
官淺淡色衣朝參從之

○匿名帖子舊有明禁而不逞之徒不使已私
者往往指人姓名揭于內府及京城內外明
加傷害

憲廟初諭都察院禁約許諸人首出并緝拿者

皆處死首者緝拿者視捉獲強盜例陞賞

○成化初御史呂洪建言鎮守總兵等官一蒙差遣輒奏添在京軍官及自帶家人支給行糧在營安坐遇有征戰反奪軍士功級冒報陞賞乞行禁革其後編修丘濬亦言總兵帶去旗牌及報效等項在營哨則凌轢將卒過州縣則劫制官吏當矢石則在後報功次則爭先多致將領不協軍士離心可一切革去不用必不得已亦須編成隊伍與隨征官軍

一例差遣此弊不獨當時爲然而在乎爲尤甚故漫記二公之言于此

○先朝於謫官皆不次陞擢如

憲廟初陞江浦知縣彭烈爲河南府知府嘉定知縣龍晉爲徽州府知府束鹿知縣盛顥爲邵武府知府博羅知縣邵銅爲温州府知府衡山知縣鄭冕爲衡州府知府襄陽知縣李人儀爲荊州府知府皆以御史言事左遷者憲宗初太監陶榮乞寺額勅禮部曰京城內外

寺院已多而勢力之家往往增修不已或豪奪民居詭稱古額假名禳災而實因以生災今後不許妄自增飾輒求寺額未幾禮部尚書姚夔因皇太后誕日建設齋醮會百官赴壇炷香爲禮科都給事中張寧等所劾言臣之於君願其福也當勸以修德善願其壽也當勸以去逸欲今不能盡所當爲乃辦香尺楮列名其上宣揚於木偶之前相率而拜曰爲朝廷祈福祝壽爲後世笑昔

英廟復位屬有足疾其時一二大臣不察古人
行禱之義亦嘗爲此舉非以扶名教全治體
也得旨所言有理今後齋醮不許百官行香
○未樂以來夷人來降者多散處於畿輔之地
謂之韃官韃舍給以月糧乂而生息漸繁獷
悍如故成化初南京御史鄭安言門庭之內
非豺狼所宜伏萬一四方有警彼時伺變而
動昔晉徙戎內地而五胡雲擾近曹欽用達
軍謀叛其明驗也願將畿甸降虜設法處置

或遠徙邊郡或分置外衛配隸軍伍之中治以中國之法其原管頭目亦調隔別衛分不得羣聚一處坐生其心夫人少則易制勢分則易制庶戎心未遏中國底寧此疏甚是於時部覆乃謂徙戎之論朝廷徃因言者有達官不必動之詔事遂寢

○成化初南京給事中王徽言事疏中有開言路一款甚切時弊大略言 皇上下求言之詔始命諫官直言覆許諸人直言是以讜言

日進於朝然發下所司施行者多因不便已
私託以他故妄奏不行或有施行亦虛應故
事言者見其如此皆曰言旣如此不如不言
此言路所以不開也至於奸佞在位尤懼直
言故於進言之人多方鉗制或指爲輕薄或
目爲狂妄或尋其瑕疵或幸其差失凡有更
張則曰變亂成法凡有薦舉則曰專擅選官
凡有彈劾則曰排陷大臣明則加以重刑暗
則私懷怨恨言官見其如此皆曰非徒無益

於國實足自禍其身此言路所以不開也

徽又言禁庭之內未有不用內官者人君因委以國政授以大權使壞國亂家然後治以重刑戮於朝市遠如趙高李輔國之徒近如玉振曹吉祥之輩皆始愛之而終殺之伏願遵高皇帝舊制今後內官不許在外管軍亦不許置立田產房屋其家人義男悉令所司究其來歷發回原籍當差亦不許文武官員僧道人等與之私相交接凡朝廷事無內

外政無大小悉斷自宸衷不使內官得與其謀至於奉侍左右亦惟擇謹厚者爲之且彼之所欲者不過富貴陛下厚其賞賜使之豐足有餘無復外望則天下蒙至治之澤而宦官亦享悠久之福矣

祖宗朝以國子監錢穀爲養賢之用例不鈎考天順己卯祭酒劉益爲監丞閻禹錫所訐言會饌久廢而椒鹽等物折錢鈔者不以時給諸生爲他用戶部以聞遂下益與典簿徐敬

於獄鞠問敬謫戍益從未減而國學錢穀自此遂鈎考矣

○都御史軒輓性廉介其按察浙江屏去一切供應俸資外一無所取朝夕蔬食布袍待賓客無兼味約束同僚三日一市肉不過一斤官吏畏之親喪聞訃次日卽行僚屬尚有未及知者

○給事中李森言事疏內有重名器一段其略言名爵者天下之公器近乃有無軍功而陞

侯伯都督者有無才德而陞大臣重任者有
因琴棋繪巧而陞文職者有因醫卜技能而
陞軍職者爵祿日輕廩祿日費請今後陞侯
伯都督者必考其有何軍功大臣重任者必
察其有何才德至于各處方面既公同推舉
有不當者許科道指實糾劾治以重罪如此
則爵祿日重而廩祿不費矣

○舊制祭陵惟遣駙馬一員而各衙門官隨
行陪禮天順八年秋祭禮部言今加裕陵爲

四相去隔遠各官往復奔走不無倦怠失儀
乞遣駙馬二員率陪祀官分詣行禮從之遂
爲定制

○寧遠州本中國地國初屬雲南布政司宣德
初黎利叛朝廷予之故地乃併寧遠州及廣
西太平府之祿州爲所占當時有司失於檢
察至今遂陷於夷

○天順八年十月立武舉法凡天下諳曉武藝
之人兵部會同京營總兵官於帥府內考其

策略於教場內試其弓馬能答策二道騎中
四箭以上步中二箭以上者官自本職量加
署職二級旗軍舍餘授以試所鎮撫民人授
以衛經歷月支米三石能答策二道騎中二
箭以上步中一箭以上者官自本職量加署
職一級旗軍舍餘授以冠帶總旗民人授以
試衛知事月支米二石俱送京營總兵官處
贊畫方略量用把總管隊以聽調遣果能建
功請命陞擢

祖宗以來凡遇 聖節正旦冬至皆賜羣臣宴
官卑祿薄者免宴賜以鈔謂之節錢俾均惠
其家屬自正統以來內臣用事者畏侍宴上
立遂罷宴皆給以鈔因而成例

○南京科道官李鈞等因太監牛玉事敗因建
言鑒往事以防後患其略言防患之道非欲
使內臣遠去左右也惟不許內官與國政不
許外官與內官私相交結不許內官弟姪在
外任事并置立產業而已自古內臣當無事

之時似爲謹慎一聞國政便作奸欺如聞

陛下將用某人也必先賣之以爲已功聞

陛下將行某事也必先泄之以張已勢人望日

歸威權日盛而內官之禍起矣所謂不許內

官與聞國政者此也內官朝夕在陛下左

右大臣無耻者多與之交結或饋以金銀珠

寶或加以奴顏婢膝內臣便以爲賢朝夕稱

美之有正大不阿不行私謁者便以爲不賢

朝夕譏謗之雖陛下天縱聰明而日加浸

潤未免致疑稱美者驟躋顯位讒謗者久屈
下僚怨不歸于內臣而歸于朝廷恩不歸于
朝廷而歸于內臣賄賂日行威權日盛而內
官之禍起矣所謂外官不許與內官私相交
結者此也內官弟姪人等授職任事倚勢爲
非聚姦養惡家人百數貨貨萬餘田連千頃
馬繫千匹內官因有此家產所以貪婪無厭
姦弊多端身雖在內心實在外內外相通而
禍亂所由起矣此臣等所以勸

陛下不許內官弟姪在外管事並置立家產者
此也疏入調外任

○天順八年十二月陞左正一孫道玉爲真人
給誥命道士乞恩膺封自此始

○成化元年正月朔適值立春百官行慶賀禮
順天府官進春致詞云茲遇紀元成化正旦
逢春氣節會同天人交泰恭惟

皇帝陛下膺乾納祐奉天永昌

○給事中秦崇言師克在和今鎮守者有善謀

而巡撫者或言其否巡撫者有奇策而總戎者或指爲非進止殊途戰守異見何以成功憲廟報曰人各有長朝廷所以參用文武內外之臣以任邊計正欲其彼此相資可否相濟以共成王事耳苟或各懷私妬護已之短沮人之長幾何不遺邊患大抵天下之事同則成異則敗者皆然也戒其異而勉於同豈特邊臣爲然哉

○編脩丘濬言兩廣之賊所以多於前者起於

前日總戎者之濫殺無辜也蓋此輩俱是平民方無事時輸賦稅供力役養兵奉吏將賴以爲已之保障一旦外寇入境焚蕩其室廬戕殺其親屬欲入城則閉門不納將入山則又與賊遇四顧無依不幸爲賊所虜姑從之以延頃刻之命賊劫持而虐使之行則使負擔息則使樵爨攻城則驅之以當矢石反奔則棄之以遺官軍僥倖不死賊去之後仍趨官府輸賦役如常時其心固自忖曰我之從

賊豈得已哉他日賊平我等故良民也忽聞大軍之來喜得更生大軍旣至其真賊遁入深山顧將不得已從賊者誘而出之殺以爲功由是聞者皆甘心爲賊矣宜曲加寬貸許其殺賊贖罪按散賊黨與以孤其勢其計無便於此者

○成化元年二月巡撫湖廣都御史王儉言時事內有挨查僧道一款謂我朝裁損二教明示禁約今游手之徒冒名僧道動計萬千

乞如律禁革私自簪剃者勒令還俗解發原籍當差仍嚴官民人等布施之禁及雲游行脚寺觀潛匿者一體治罪如此則人少游惰戶口可增矣

○反賊趙鐸四川德陽縣人兵敗爲千戶田儀所斬傳首京師好事者稱其首重可十八斤
○倉大使李添瑀官考滿不稱貸千金賂內官郭聰聰以手帖囑吏部得湖廣倚北湖河泊所事覺尚書王翱等認罪得旨姑貸之今後

有以帖子囑託者隨卽奏聞不許隱匿

○毛吉餘姚人舉進士爲刑部主事執法不避
權貴偶以失朝下錦衣衛獄指揮門達選健
卒撻之幾死旣得釋操法愈勵後陞僉事屢
擒巨盜陞副使追賊至密岫山衆寡不敵力
戰而死方吉出軍時以官帑金四千兩爲犒
賞委余文司出納已用三之一矣文憫吉死
而貧其家無以爲歸計以所餘金密授其僕
使持歸是夜僕之婦忽據中堂舉止如吉狀

顧左右請夏憲長來舉家驚惶胡僉事榮亟
往視之瞪目視曰非也頃之夏至乃起揖而
言曰某受國恩不幸死于賊固無餘恨但余
文所遺官銀已付某家雖官府無所稽考然
汙我於地下矣願亟以還官言畢而仆於戲
生能殺賊死無所憾真忠臣也生不受錢死
不受汙真廉士也

○成化初命光祿寺今後一切祭祀饗宴等項
買辦牲口每年不許過十萬果品不許粘砌

祖宗以來凡閹割火者皆罪極之人或俘獲之
虜景泰以來近畿民畏避差徭希圖富貴者
往往自宮赴禮部求進自是以後千百爲羣
禁之不能止爲國之蠹甚矣

○成化時廣東按察使夏垣言兩廣越在嶺表
天生猺獞不可盡除今乃乘威武不振之時
撫字乖方之日逼脅平民使爲賊黨賊之糾
合者纔有數百民之脅從者無慮數千進則
驅我民以當矢石退則殺我民以抒怨怒是

害常在我而利常在彼也況用兵不已供費日煩以易搖之人心供不已之軍費臣恐外患未除內變將作若善爲撫綏招致俾見在之民懷惠而不動搖被脅之衆聞風而皆歸附則賊黨自消矣

憲宗嘗諭六部臣曰天工人其代之若事當行而緩於覆奏是忽天工也其可乎自今各衙門一應奏題旨意卽明白覆奏發落毋得稽緩五日內不覆奏者該科劾之

成化初禮部言近年哈密不時來貢動以千百名爲進貢實則貪饗宴賜朝廷保小懷遠之仁固不恤此然道路疲於遞接府庫竭於賞賜合酌量事體哈密使臣歲一入朝不得過二百人凡加恩闌五十人其土魯番亦力把力等或三年五年入貢不得過十人乞勅甘肅等處總兵巡撫等官嚴加防範仍勅哈密王毋等依期來朝從之

○成化初大學士李賢言荆湘賊寇雖已徃征

其間山林深阻流民積聚衆多賊聞大軍南下必邀劫流民以爲黨助其流民亦恐官軍一槩剿殺因而黨賊偷生如此則賊勢益衆愈難撲滅宜降榜文開諭流民俾各安業有能率衆擒賊首或斬首來獻比軍功加倍陞賞其有被賊脅從走脫來首者免其罪有功一例陞賞從之

○成化時諭德孔公恂言京師天下根本今內政不脩將老兵弱何以應變北虜近爲邊患

兵部榜諭各處召募壯勇夫朝廷養兵百年
纔有小警輒欲募兵以有示弱之意萬一黠
虜窺我虛實擁衆南下不知誰可禦之者臣
見京師以南德州臨清東昌徐州等處皆襟
喉要路除運糧操備之外守城不過疲卒二
三百人間亦有空城者小有阻滯糧道不通
請於德州抵徐楊及真保定等處起集民壯
分屬軍政官訓練以備不虞詔下其奏於所
司

○成化時禮部言南京兵部尚書李賓奉勅賑濟南京饑民議浙江福建江西并直隸生員及軍民子弟納米送監讀書竊惟國子監乃育才之地朝廷資以致治者也近因各處納草納馬生員已不勝其濫今又行此令將使天下以貲爲賢士風日趨於卑陋安望有資於治理哉

憲宗曰祖宗設太學以教育賢才非由科貢者不得濫進今賓等建議欲令官民子弟出錢

穀以賑饑民補太學生古無此比且天下財賦所出其途孔多學校豈出錢穀之所哉禮部議是其勿許

○成化時兵部郎中楊琚言邊事內一款云各邊殺賊官軍遇有生擒斬首多爲管隊官旗詭爲已功亦有俟於中途見有虜首以財挾買不從則恃衆強奪者亦有依將領之勢挾取他人功次以爲已有者亦有將領見部下獲有二功欲取其一以惠所親者如此之弊

不可縷數

○成化時禮部尚書姚夔奏今京城街市多有疲癯殘疾之人扶老携幼呻吟悲號亦足以干天地之和而四夷使臣見之將爲所議昔文王發政施仁必先鰥寡孤獨伏望

皇上以恤民爲心特勅巡街御史督五城兵馬拘審道途乞丐殘疾之人有家者責其親隣收管無家者收拾養濟院照例時給薪米其外來者亦暫收之候天道和暖量與行糧送

還原籍有司一體存恤務令得所此亦調攝和氣之一端也

憲宗可其奏曰無問老幼男女有無家及外來者順天府尹盡數收入養濟院記名設法養贍毋令失所

○國家優厚運軍許其帶土產物貨以資用度成化元年漕運總兵楊茂復奏免其各關之稅而今乃嚴爲之禁不許順帶物貨浸失祖宗初意矣

○成化元年秋南京吏部郎中夏寅奏馬快船隻供應艱苦所載官物一箱一櫃而已輒用一船夾帶客商裝載私貨所至騷擾法宜禁約部覆從其言凡送官物務儘船裝載每船添夫上水二十名下水五名軍衛三分有司七分違者并應付之人皆治以罪

○成化元年十一月上謂戶部臣曰律條明開收受稅糧聽令納戶親自行槩平斛交收比來收糧者作弊多端且每石加耗米一尖

不過五升今軍官願明加一斗可見官攢人等侵害過多今後收糧俱用平斛聽令旗軍行槩每石耗米五升二十斛加與一石落地餘米旗軍自收不許隨斛上倉亦不許官攢人等勒要囤基財物仍嚴加禁約敢有仍前作弊許令巡倉御史叅奏究問

○都督過興鎮廣西還道經祁陽怒知縣李翰應接不以時令子得隆率部卒拽翰及其子釗撞掠之俱死河下翰妻愬於朝勘得實時

與以疾卒于道興妻爲子求免死

憲宗不允命卽誅之

○高州府知府劉海者湖廣人知高州時值廣西徭賊入境民携家避賊者海皆閉門不納城外積屍數里犬食皆肥腴海乃烹犬食之時有城裡人食狗城外狗食人之謠

祖宗時鈔法通行故官員以鈔折俸其後新鈔一貫時估不值十錢舊鈔纔值一二錢甚至積之市肆過者不顧以十貫折俸一石是斗

米一錢也小吏俸薄無以養廉莫甚於此

○光祿寺卿蔚能者陝西朝邑人雖出身吏胥而盡心職事每宴會躬自檢視必求豐潔在光祿三十年未常持一嚮還家其尤可稱者能嘗率其僚請清查入內供應器皿有旨逮問能謂其僚友曰上怒不可惻某老矣請獨任之諸公方嚮用不以相累也旣而獨受責降調官南京退無後言今之士夫平日以意氣相處者位相軋則相傾過相累則相諉

者視此胥有愧矣

○舊例中鹽者皆戶部定則例出榜召商無徑奏者成化二年有富人呂銘等投托勢要奏中兩淮運司存積鹽五萬五千引有旨自中出允之時戶部不能執奏鹽法之壞自此始祖宗朝河道但命巡鹽御史兼巡之成化二年久延命御史一員提督通州以南抵臨清及衛輝一帶河道

○成化三年三月命戶部尚書馬昂都御史林

聰給事中潘禮陳越清理京營軍士賜之勅
曰朕以京營軍士視其名則案牘充盈究其
實則隊伍空虛關糧之際填塞倉衢受賞之
日溢滿禁塗及至收集部曲往赴邊鄙累旬
日不能得數萬蓋總兵等官縱之歸休役之
私用受賄買閒應付權貴其弊難以枚舉今
特命太監懷恩會同爾等將見在軍士點閘
且以十五萬實數來報有隱蔽不報抗拒不
服卽奏聞拿問削奪清理之後仍創爲良法

以備調用夫朝廷勞天下之民以養兵而耗天下之兵於奸弊兵民日困奸弊日深及至有事之時爾等付之長歎息而已則曷若今日不避怨怒盡搜其弊源而窒塞之以復祖宗時兵制之盛乎按此勅極悉營制之弊此舉三十年一行之可也

○成化初四夷館譯字官生見有一百五十四員名而教師馬銘又違例私收子弟一百二十六名爲禮部所劾

憲廟命禮部會官考選精通者量留餘送吏部
改用子弟俱遣寧家後有私自教習者必罪
不赦

○成化三年國子監助教李伸言欲蔭大臣之
子事下廷議謂爵以待賢理不可濫教養之
法義不可缺乃命在京三品以上官子孫各
一人入監讀書

○成化初國子監學錄黃明善疏陳都掌禦寇
事宜內請用毒毬行烟謂毒毬所薰口眼出

血行烟所向咫尺莫辨近日亦有以此獻於
巡撫山東都御史宋應昌謂可用以禦倭者
然試之無驗

○兵部侍郎兼學士商輅言從祀諸儒有未加
封爵者於所被章服殊不相稱於是追封董
仲舒爲廣昌伯宋胡安國爲建寧伯蔡沉爲
崇安伯真德秀爲浦城伯

○陝西茶馬司舊制每歲再遣行人巡視成化
三年巡撫陝西都御史項忠言近日勢家及

射利之徒往往交通守備官私販入番茶馬之政遂壞行人職卑言輕難以禁治乞依巡鹽事例暫遣風力御史一員往督其事陝西茶馬之差始此

○成化時禮部言學校端本澄源之地孟子切切於義利之辨誠恐學者利蠹其心也近年學校生員聽令納馬納牛納草納米入監殊非教養本意且前代雖有納粟補官之法令而不用以補士子爲士子者知財利者可以

進身則無所往而不謀利或買賣或舉放或
取之官府或取之鄉里視經書如土苴而苞
苴是求棄仁義如敝屣而貨財是殖士心一
蠹則士氣士節由此而喪他日致用何望其
能興治有補於國家哉自今伊始雖有邊事
緊急艱難之處亦不許以監生生員納粟納
馬等項出身若再以此例開端者許該部六
科十三道糾正之以端士心而美教化

○成化時學士商輅陳言時政內廣儲積一款

言臣切見各處預備倉所儲米穀本以賑濟饑民每歲官司取勘口數里老止將中等人戶開報其鰥寡廢疾無所依倚者一槩不報蓋慮其無力還官負累賠納故也今後各處預備倉饑民開過米穀不拘豐中年歲通取息一分有係鰥寡廢疾無所依倚之人不必追徵將所收之息抵補其數抵補之外或有餘剩自作正數入倉仍乞令巡按分巡等官嚴督府州縣正官收放之際務在親行提調

痛革出納之弊庶幾官無虛費民得實用

憲宗嘗謂禮部臣曰京城內外居民輳集處所多有內外官員人等增修寺觀廟宇禮部其嚴加禁約尚書姚夔等請揭榜禁約繼今不許於原額外增修請額違者許巡街御史五城兵馬司擒治仍行順天府曉諭鄉村一體遵行

○成化三年有訓導高瑤者上疏於朝請加景泰廟號下部議左庶子黎淳疏言正統十四

年八月已冊立 陛下爲皇太子至九月羣臣又奉邸王卽帝位臣惟朝廷旣立皇太子則異時居天子之位乃皇太子也乃又立一親王爲天子則所立之太子將何爲哉當時雖曰主少國疑四方多事然周成王時姬旦實有功之叔父何不遂取天位特以君臣有定分而不敢耳今如高瑤此言有死罪二一誣 先帝爲不明一陷 陛下於不孝乞究主使之人疏入 上曰景泰已往過失朕不

介意豈臣下所當言顯是獻諛希恩俱不必行

成化三年冬以明年上元將張燈預命翰林院詞臣撰詩詞編脩章懋黃仲昭檢討莊杲疏言今兩廣弗靖四川未寧遼東賊情難測北虜尤當深慮江西湖廣亢旱數千里正宵旰焦勞不遑暇食之時兩宮母后同憂天下之日豈宜張燈爲樂哉至如翰林官以論思爲職雖曰供奉文字然鄙俚不經之詞豈

宜達於君上固不可曲引宋祁蘇軾之教坊致語以自取佞慢不敬之罪也疏入上曰元宵張燈儒臣應制撰詩歷代有之

祖宗以來不廢此典朕今視舊減省止存其槩以奉兩宮聖母豈至妨政害民懋等不通典故妄言譏議難居文翰之職命杖之調外任於是懋得臨武知縣仲昭湘潭知縣景桂陽州判官

○成化間樂舞生李希安以積官加禮部尚書

掌太常寺事說者謂本朝革中書省立六部以分掌國政不宜令雜流叅之後又令希安經筵侍班爲科道所劾乃得旨經筵之設所以講明道學關係甚重故侍從皆用文學之臣希安旣非儒流可罷侍班

○成化初西僧以秘密教得幸服食器用僭擬王者出入乘輿輿衛卒執金吾仗前導達官貴人莫敢不辟路每召入大內誦經呪賜予駢蕃日給大官牲餼酒饌至再錦衣玉食幾

千人中貴見輒跪拜坐而受之法王封號有至累數十字者

○成化初尚膳監太監潘洪奏令其姪潘貴中納兩淮運司積餘鹽戶部奏其阻壞鹽制

憲宗曰朝廷存積鹽課以待邊用祖宗明有禁例食祿之家尚不可中況內臣乎內臣給事內廷凡所以養生送死皆朝廷爲之處置固不必營私以殖生況乃損國課以益私家乎其勿與

○靈山縣知縣林錦者有能名陞試廉州府知府
益脩其職招集流亡捕滅賊盜守臣薦於朝
乃陞廣東僉事

○成化四年六月二十六日

慈懿皇太后崩禮部言孟秋享太廟正在哭
臨之內乞移至初七日令仍於初一日祭
慈懿皇太后崩

憲廟奉皇太后意不欲合葬止於裕陵左
右擇地於是內閣諸臣及五府九卿翰林科

道交章極言其非是章旣上跪伏文華門前
以待必從而後已

憲廟悉覽其奏爲懇請於 皇太后自己至申

稍見從於是批允合葬羣臣皆呼萬歲而退

○成化時戶科左給事中丘弘言近嘉善公主
累請文安等縣閑地西天佛子劄實巴奏求
靜海縣地及宛平佃戶夫公主食祿之家也
劄實巴佛之徒也乃反慈愛之教而以剝削
爲事豁壑之欲必至無厭承行者受其囑託

略無執辯之詞勘報者畏其權勢俱作空閑之數原其所由皆無籍之徒竊假投獻而漁獵其中奸狡者投爲管業而囊橐其內之所致也況地踰百頃百家之產也豈可徇一人之好惡而奪百姓之恒產哉疏上詔以田土除勘明給賜外其餘仍覈實以聞繼今凡有求者一切不許著爲令

○成化時戶部會議漕運事宜內一段言隣近河道南北往來馬快流船晝夜不絕起集軍

夫接遞常以一二千計凌冒風雨送往迎來艱苦萬狀而經過官船往往附載私鹽客貨應付稍緩輒將官吏高懸痛箠不徒索夫兼且求賄原其所由皆其隨從僕隸指使之也宜禁約内外公差官員船運載官物不許附帶私鹽客貨其隨從僕隸姓名及上水下水夫數悉於關文明白開寫敢有多索一夫一軍及分關前驅逼取錢物者許巡河御史按察司官將各人隨從僕隸并附船客商拏問

民編口外軍發戍邊鹽貨入官

○成化時御史劉璧等言吏部之選舉雖下僚末職亦不過其實奏聞上請裁處未敢自專或薦非其人士論得以攻之臺諫得以言之朝廷得以罪之列聖立法所以不自簡除正以此耳陛下雖明見萬里果盡知其孰爲賢而可用孰非賢而不可用萬一知有未盡則必詢諸一二近侍之臣然能保其果無受賂市恩而所舉非所用乎在外者以爲專

主於陛下而不敢言其失彼自以爲得計
方且夤緣作弊賣官鬻爵無所不至則其爲
患也大矣且君上之職與臣下不同君總其
綱臣任其煩若在京四品以上官陛下悉
自簡除非惟勞煩聖體毋乃以萬乘之尊而
行有司之事乎竊以爲此非出陛下本意
必有不恤國體偏爲身謀之人欲假陛下
之專以塞天下之口竊朝廷之權以濟一己
之私耳

○舊制頒詔皆置詔于櫝以繩懸之自承天門頒下成化四年秋頒

慈懿皇太后尊謚詔執事者不恪以致繩斷櫝毀爲御史所劾竟宥之人皆誦聖度之寬如此

○成化五年以正一嗣教真人張元吉凶暴貪淫或囊沙壓人致死或投之深淵前後凡殺四十餘人爲族人所奏械繫至京刑部尚書陸瑜等奏張氏遠祖假以符錄繆稱玄宗無

補於國無益於世前代雖間有封號未有品級至我朝革去天師之號止稱真人今其子孫不肖罪惡深重元吉當凌遲處死其妻子當流其黨當絞斬其族當籍而徭役之仍宜毀其府第革其勾管都目諸人勿令印行符錄以誣惑斯世

憲廟令元吉如所擬妻子免流仍擇其族人廕封當時不能執論絕其根源致令其徒奉行至今自若深可惜也

○成化五年內使杜衡盜內府金二兩銀二百兩事覺都察院擬罪當死例得贖

憲廟命卽斬之於市

○成化中都督同知武忠貌雄壯善射嘗使朝鮮國人請閱兵因以弓矢請射忠挽弓輒嫌其軟並張兩弓折之會有鴈橫空而過國人跪請射忠援弓射之應弦而落國人懼服

○都督同知馬良館陶人嘗以幼童侍

憲廟於青宮甚見親暱後良喪妻不數月娶繼

室鼓樂聞禁中

憲廟聞知謂左右曰良喪婦未久何以卽娶夫
婦之情何其薄也自是寵遂衰不復召見
聖情之篤於倫理如此

成化時兵部以都督劉玉當聽調征西所統
馬軍缺少乞於別營選補

憲宗曰團營軍選補未久如何又要選補不允
有警令全營以往然此中必有情弊其令內
外提督并坐營官具實回奏於是撫寧侯朱

永及玉等引咎自劾

憲宗曰初簡閱士馬委爾等提督訓練正欲兵精以備調遣也何乃因循廢弛輒至於此玉等平昔坐營怠惰及臨調又稱軍馬不足論法本難容恕姑宥之仍各慎乃事以副委托數有不足卽與選補勿致有悞

憲宗因有自宮求進者姑宥其罪發原籍當差不許投托王府勢家潛住違者論死隱匿之家發邊遠充軍

○成化時吏部尚書姚夔言舊例選授外官隨卽領憑赴任近多潛住京城揭借財物置辦衣裝娶妻買妾枉道回家自今限五日起科畫字領憑有延過半月不辭朝出城者送法司治罪有已出城復入潛住者降用違憑一年以上者革職爲民

○成化間禁京城九門并通州等處抽分內外官不得違例多取商稅違者治以重罪命都察院榜示之

皇明典故紀聞卷十四

終

典故紀聞卷十四

皇明典故紀聞卷十五

交河 余繼登 緝

臨朐 馮琦 訂

新城 王象乾 校

成化六年順天府尹閻鐸以歲饑坐視民患不能賑濟爲戶科所劾遂降衢州府知府其府丞而下并巡城御史俱加罰有差

祖宗朝急于民瘼如此今稍寬矣

○太平蕪湖荊州沙市杭州稅課舊無抽分官

成化七年工部尚書王復始請添部屬三員
分往抽分竹木變銀爲營繕費是年所得僅
千兩後至者以多得爲能至萬餘兩歲歲加
增朘削無極言利之臣貽害如此

祖宗之世最重封爵如公侯伯皆論功定議蓋
積其前後之功無官可酬乃始加之非如千
百戶指揮可累級陞也自都督同知趙輔征
兩廣回大肆賂遺遂得封伯後太監劉永成
姪左都督聚亦以微功得寧晉伯無復舊制

而人亦不以得爵爲難矣

○大理卿王槩爲按察使時以旌異得賜誥命後歷副都御史大理卿以品秩相同不得請給上疏乞恩詔特許之舊制大臣無有兩給三品誥命者有之自槩始

○北直隸舊止巡撫一人成化八年九月兵科都給事中梁璟言畿內八府境土廣遠巡撫一人兼理邊備卒遇有警恐悞事機乞以河間保定以南六府專委都御史陳濂巡撫其

薊州抵密雲一帶邊關及順天永平二府屬另擇重臣一人專督兼理巡撫之任部覆從其言乃以命都御史張綱二巡撫之設自此始○成化時給事中白昂言大理寺審錄有詞稱冤人犯駁回在外衙門再問多偏執已見不與辯明或用非法重刑鍛鍊成獄囚人慮其駁回必加酷刑雖有冤枉不敢再言今後有問招不明擬罪不當者俱乞改調相應官員問理不許鍛鍊成獄違者雖無贓亦依律問

罪送吏部改調從之

○成化時都御史李賓言在外官司聽斷官民詞訟動輒罰人財物始則暫寄官庫以欺人終則通同庫役以入已又預備稽考告訐假立文簿虛作支銷宜行禁革嚴治其罪從之

○成化七年立春以星變避殿御奉天門便服進春免賀

○成化八年元旦以星變免慶賀羣臣但具朝服行八拜禮

○舊制殿試在三月初一日狀元率進士上表謝恩在初六日成化八年以悼恭太子發引改殿試於十五日至今因之

○成化時廣東按察司言婦人犯笞杖并徒罪者例俱單衣的決但其間所犯多緣連累且素懷廉耻之人一被刑辱終身莫雪甚爲可憫乞自後除姦盜不孝與樂婦的決餘悉納鈔贖罪遂著爲令

○成化時宣府龍門所火焚官草五十七萬餘

有司獲縱火者以聞命卽斬以徇籍其家資以抵草數不足則令經收看守官補之

○成化時總督漕運都御史張鵬請給僧道度牒鬻米濟荒

憲宗曰僧道給度不宜太濫且鬻米之數所得幾何而所損於國者多矣其在官吏監生尚不可以爲常況此輩乎其勿許

○河東鹽池舊止以巡按巡視成化九年三月戶部郎中文志貞言巡按等官不得以時臨

視故人得私販官鹽阻壞客商少中無以濟
邊用之急請歲遣御史一人往彼禁治料理
歲滿更代如巡茶之例乃始設河東巡鹽御
史

○舊制時享 太廟俱於近午時行禮成化九
年四月初一日時享 太廟是日日食百官
當採護禮部奏請早行 廟享禮

○舊制廩膳生員考黜者仍追食過廩米成化
九年北直隸提學閻禹錫始奏免還官

○故事四品官父母死有祭無葬成化九年八月少詹事柯潛父死特賜以葬時以爲榮
○御史楊守隨言爵賞不可以無律名器不可以假人頃因山東災傷許辦事及寄名吏納銀免考悉依資格選用倖門一開越次授職蕩無紀極爭相黷貨以規驟進其于害政莫此爲甚

憲宗批答曰朕患吏道不清嚴考試以爲進退今若募胥吏入貲賑饑免考登仕是教吏貪

也御史言是其亟罷此例按奸吏舞文以貪賄挾賄以買官倚官以剝民故每遇開例吏之加納者半吏治不清民生不遂多由於此憲宗此旨百世所當遵也

程明道伊川二先生祖家保定博野縣人其五世祖端明殿學士羽始遷洛陽成化間博野知縣裴泰建言請立祀命有司春秋祭祀○成化年間因擒獲妖人追其妖書圖本備錄其名目榜示天下以曉諭愚民其書有番天

揭地搜神記經金龍八寶混天機神經安天
定世繡瑩關九龍戰江神圖天空知賢變愚
神圖經鎮天降妖鐵板達通天混海圖定天
定國水晶珠經金縝洪陽大策金鋒都天玉
鏡六甲明天了地金神飛通黑玩書通天徹
地照仙爐經三天九關夜海金船經九關亡
返纂天經八寶擎天白玉柱夫子金地曆劉
大保泄漏天機伍公經奪天冊收門纂經佛
手記三煞截鬼經金鎖攔天記緊關周天烈

火圖玉盆經換天圖飛天曆神工九轉玉龕
金燈記天形圖天髓靈經定世混海神珠通
玄濟世鴛鴦經錦珊瑚通天立世滾雲裘銀
城論顯明曆金章紫綬經王賢鏡四門記收
燕破國經通天無價錦包袱三聖爭功聚寶
經奪天策海底金經九曜飛光曆土金金華
蓋水鑑書照賢金靈鏡經硃書符式坐壇記
普濟定天經周天烈火圖六甲天書三災救
苦金輪經智鎖天關書感天迷化經變化經

鎮國定世三陽曆玄元寶鏡玉傘錦華蓋換
海圖轉天圖堦背書九曜飛天曆彌勒頌通
天玩海珠照天鏡玄天寶鏡經上天梯等經
龍女引道經穿珠偈天形圖應劫經天圖形
首妙經玉賢鏡透天關盡天曆玄娘聖母親
書太上玄元寶鏡降妖斷怪五家經金光妙
品奪日金燈紅塵三略照天鏡九關番天揭
天神圖金鋒都天玉鏡玉樹金蟬經玄娘聖
母經七返無價紫金船銀城圖樣龍鳳勘合

○僧官常琇者拜故南和伯方英爲父修武伯
沈煜泰寧侯陳桓豐潤伯曹振錦衣指揮王
珩皆與交好琇至各家飲酒皆設鼓樂琇每
招妓與亂後其徒因與爭寺產因發其通英
妾諸罪遂並下錦衣衛鞠實琇杖發遼東充
軍煜桓振珩各坐罪停俸有差仍命都察院
出榜曉示此真可爲官員交好奸僧之戒也
○成化時刑部主事張鼎言固原平涼乃三邊
總會之所虜寇侵犯累從此入宜置立總府

諸臣會議乃命左都御史王越駐劄固原總督諸路軍馬陝西總制始此

○成化時以街渠汙穢壅塞爲工部所奏逮兵馬指揮并巡城御史錦衣衛官校於獄

○成化十年十二月有自宮者五十餘人日赴禮部喧訴求進尚書鄒幹以聞命錦衣衛執之枷項於禮部前并各大市街示衆

○寧晉伯劉祿成化十年襲父爵次年三月卒憲宗以祿幼且襲爵未久惟賜祭不予葬且免

輟朝命有司著爲令

○成化十一年冬有自宮聚至四五百人闕囂求收用

憲宗云此輩逆天悖理自絕其類且又羣聚喧擾宜治以重罪但遇赦宥錦衣衛其執而杖之人各五十押送戶部如例編發海戶當差是後有再犯者本身處死全家發邊遠克軍禮部移文天下禁約

○成化十二年二月朔日食望月食

○成化時錦衣衛奏京城內外盜賊生發前後捕獲七百餘人其中強盜多係僧人乞自後僧行道童不給有司文憑私自來京者緝出俱發邊衛并罪其所主之家從之

○成化時九卿以災異陳言內一款軍民服色器用近多僭越服用則僭大紅織金羅段遍地錦騎坐則僭描金鞍鞬減銀鞦轡首飾則僭寶石珠翠今四方絲貴金少率皆坐此宜嚴加禁約違者卽重罪而沒入之此侈風在

今更甚尤宜禁止

○成化時大學士商輅因災陳言內一款臣聞天下之治亂係下情之通塞

太祖高皇帝臨御之時自羣臣以及民庶于可言之事許直至御前陳說所以廣耳目達下情也 皇上承嗣以來詔求直言而人多顧忌不肯盡言意者聽言之道未至乎望明詔在廷羣臣凡致災之由彌災之策悉陳以聞○成化時定西侯蔣琬言養兵之利莫善于屯

田今竭東南民力漕運以實京庾又勞八府民力飛輓以供邊餉民兵俱弊費出無經屯田之利則未徧舉且大同宣府等處膏腴土田無慮數十萬頃悉爲豪強占種租稅不供稍遇兵荒全仰內郡其八府良田又多爲勢要之家妄以拋荒奏乞日漸侵剝失業之民控訴無所脫使邊關有警內郡何由接濟運河有阻京師何所仰給居安思危不可不慮乞令戶部會議遣剛正給事中御史二員視

往年甘肅增糧事例檢勘丈量定著科額入
府民田亦乞嚴立禁條不許豪奪庶幾兵民
足食內外有備

○成化間戶部覆甘肅巡撫宋有文奏言邊儲
虧折非獨甘肅爲然如遼東大同諸處往往
事覺盤窵未報大抵糧儲乃生民膏血而邊
方險遠類難急致其間侵盜之徒率多延緩
以覲脫免今宜定爲通例凡盜糧五十石草
一千束錢帛直銀二十五兩者仍用常典多

者一如近例監追克軍四倍其數則無問文武職官吏與斗庫部運諸人雖宥不赦正犯或有逃故逮其親屬如此則糧不重費人知謹守疏上詔如議且令正犯逃故於同爨至親家屬追之

成化時禮部覆整飭邊備兵部侍郎馬文升奏光祿寺筵宴夷人酒飯菲薄

憲宗曰宴待諸夷本柔遠之道所以尊隆國體起其瞻仰非但飯食之而已必器且整齊品

物豐潔始稱今後筵宴并酒飯處令光祿寺
堂上官視之仍以禮部官一員督察有不遵
者併治以罪

○成化十二年七月京師西城有物夜出傷人
其色黑踪跡之不可得 上乃於禁中祭告
天地曰臣以菲薄之資撫盈成之運顧政事
之多缺致災異之荐臻茲者京城內外有物
夜出殘害軍民驚動閭巷夫變不虛生必有
所自意者或用度不節致傷民財歟或土木

煩興過勞民力歟或忠言不聞下情無由上
達歟或仁政不施實惠未能下究歟夙夜兢
惕罔知攸措伏惟大造垂慈曲賜矜憫赦過
宥罪轉禍爲祥俾妖物潛消居人安妥臣當
祇謹天戒循省愆尤期維新於政令以圖報
于大恩不勝惓惓懇禱之至大學士商輅等
亦條上時政闕失請付所司行之當時君臣
尚有遇災而懼警惕脩省之意

○昭德宮內使汪直得寵于

憲廟自黑青之後命出外調察物情直布衣小
帽乘驢騾往來京城內外人不知直刺得
外間隱事以取信於上上益委任遂謗及
諸大臣權寵赫奕又委官校四外緝事不拘
京官藩臬動皆拘繫西廠或夜入其家搜其
財物刑其妻女朝臣惴惴不自安于是大學
士商輅及萬安劉珝劉吉上疏極言其害言
陛下委聽斷于汪直直又寄耳目于羣小如韋
漢王英輩大張聲勢蠹眾害人使大臣不安

於位小臣不安於職商賈不安于市行旅不
安于途士卒不安于伍庶民不安于業因條
列其不法事以上謂如此不已國之安危或
未可知

憲廟從其言爲罷西廠責汪直退還本監調韋
璘邊衛差操散遣諸校尉人心快之然

帝意猶未釋然會御史戴緒以九年滿不得陞
窺知意旨遂上疏言皇上近以災變勅
令臣工脩省未聞有進賢退不肖革弊釐奸

者獨太監汪直緝奸惡懲貪賊釋冤抑禁宿
弊皆合公論而服人心假建言之名以頌直
功德疏成先以草託直所厚錦衣千戶吳綬
示直令直先爲言于 帝而後奏之疏奏

帝大悅於是直復開西廠詞察益苛破家毀族
人不堪命縉意望陞都御史乃止得尚寶少
卿

○鄉試小錄前舊有吏典掌行科舉及生員騰
錄對讀二條成化十三年以少詹事黎淳言

始削去之淳又言士子有文理差錯行文有疵表失平仄字畫差錯者皆宜究治禮部覆議平仄不順字畫差錯與文理差繆者不同宜仍令會試從之

○中外軍政官五年一次考選舊無著令成化十四年春因兵部尚書余子俊英國公張懋奏請始定

○成化十四年八月戊申早朝東班官若聞有甲兵聲者因辟易不復成列衛士露刃以備

不虞久之始定究其事所從起莫能得亦異矣

○翰林院官自永樂宣德以來俱不習儀至成化十四年冬至日錦衣緝事者奏學士王獻等不赴習儀

憲廟命鞫問二人舉相傳之例以聞宥之仍詔自今行大禮仍先期習儀惟內閣辦事者免○舊制頒曆在十一月朔成化十五年是日值冬至禮部預以爲請命改頒曆于十月朔日

○成化十五年太子少保戶部尚書楊鼎乞致仕特賜勅允之仍給月米二石歲夫四名先是大臣致仕未有給米撥夫例有之自鼎始

○成化十六年以監生虎臣言始詔天下學校孔子廟庭所在凡過其門者皆下馬

○官吏折俸布舊於甲字庫折支者每濶白布一疋折米四十石成化十六年戶部以爲言姑改折三十石然布極細者不過值銀二兩而米遇貴石值銀一兩已自懸絕後又以粗

綿布值銀三四錢者支與是粗布一疋准價銀三十兩矣從古所未有也

○成化十七年國子監丞祝瀾請天下文廟皆宜用木主禮部覆言廟制已定而瀾欲紊亂舊章遂黜爲雲南廣西府經歷後竟用木主而無人爲瀾白其事者

○舊制給事中外陞必方面知府無府州佐貳者成化十七年五月禮科都給事中張鐸兵科給事中蕭顯因言事忤旨吏部希意陞鐸

爲湖廣漢陽府通判顯爲貴州鎮寧州同知
時鎮寧州無同知特添設以授之

○舊例指官詐財滿貫犯該徒流以上罪者俱
發克軍有大誥及遇恩例減二等爲首從者
止得徒杖之罪成化十七年五月內刑部題
此輩情犯頗重如復減等恐奸僞日滋請今
後指稱京官并三司以下官名及以官府使
用爲詞誑財者俱計贓不分首從悉連家屬
發邊衛克軍原係邊衛者發極邊守哨從之

○都御史李綱山東長清縣人居官廉介爲太僕少卿時曾於冀州遇盜奪其篋將啓之問其隸知爲綱曰乃李少卿耶是無錢不啓篋而去

○成化十四年巡撫寧夏都御史賈俊奏邊儲無措請開納銀十三道御史言堂堂天朝富有四海供輸貢入不可數計使能量入爲出用一省百則邊儲何患不充軍需何患不足而爲此賣官鬻爵之事伏乞痛革前弊別爲

經久常行之策務使邊備不乏名器不濫舊章不紊異議不生疏上

憲宗曰漢文帝從晁錯備邊之策令民納粟拜爵後人惜其作俑邇者有司以乏邊儲又議行納銀事例後世又將謂何御史所言是也宜一切罷之勿行

○成化時兵部尚書余子俊以京城內外多盜請差府部屬官五十餘員會錦衣衛巡城御史查究內外官民之家有舍匿游民及無籍

軍匠罪囚者各聽首實送戶工兵三部收役
若經赦死囚遣而復來者處死隣居舍匿之
家蔽占不舉者亦以其罪坐之仍令審編火
夫坐舖巡警夜以五十人爲率獲盜必追究
舍匿之家槩治之及印子舖賭場俱宜禁治
自今犯者其房舍沒官治以重罪

○成化十七年秋禮部言烏思藏地方在長河
西之西長河西在松潘越鴛之南三處地界
相連易於混淆難以辨別烏思藏大乘法王

闡教闡化輔教贊善番王舊例三年差人一朝貢後因道險少來而長河西番僧往往偽作印信番書以冒賞賜乞立爲定制除大乘法王無地土外闡教等四王人各賜勅一道勘合二十道該貢之年道經四川陝西比號旣同仍有王印奏本方許放入其長河西魚通寧遠等處朶干及董卜韓胡諸宣慰司亦各給勘合六十道其入貢道經四川比號驗放一如例若該貢之年偶值道梗不通後不

許補貢其四川松茂州土著番僧來朝者邊
官亦照例驗放不許過多從之

○四川巡撫都御史孫仁以松潘賊劫掠欲發
兵剿之

憲宗曰兵猶火也不戢將自焚松潘賊已嘗剿
戮其渠魁亦知警矣若又縱兵恣殺彼番寨
蜎聚豈能悉滅哉貪功以起邊釁誠非計宜
令仁等乘兵威方振之餘遣人撫諭果負固
不服乃用兵剿之未晚也

○成化十八年山西巡撫都御史何喬新以按察司官延滯詞訟劾僉事尚敬等罪

憲廟言刑獄重事也周書曰要囚服念五六日至于旬時特言未得其情者詳審不苟如此苟既得之不卽結斷桎梏縲綬拘繫其身徃徃有瘦死獄中者矣夫其人罪不至死而死是刑官殺之也故律特著淹禁罪囚之條喬新劾奏甚當其卽究治其人仍令天下刑官皆知所謹以副朕欽恤之意

○成化十八年十二月通州右衛軍餘金鳳等三百九十一人自宮以求進都察院言中三百十四人俱年及十五歲法當收贖五十九人纔十歲以下乃其父兄教令爲之者當坐教令之人因奏近例凡自宮者本身處死全家發烟瘴地面克軍今犯者衆并援例上請奉

憲宗聖旨金鳳等百九十八人加項示衆滿一月仍杖一百并年幼者俱如擬皆發原籍原

衛收管

○晉寧河王府自成化十七年以來每夜有妖見或爲神像或爲王侯需索酒食時舉火將焚宮十八年十二月十八夜果焚府第無遺冠服器用皆盡妖亦隨滅其事甚異

○成化十九年三月內官王鈿奏令家人中河東鹽二萬餘引戶部請治其罪

憲廟曰祖宗之制內官不許私置產業矧敢違例中鹽與民爭利且其服食之需皆自內給

今鈿營利於外將焉用之戶部其查例揭榜
禁約後有犯者必罪不宥

○太監汪直倚恃權勢凌轢有司所過動遭捶
撻嘗至定州知州裴恭預爲饌具以待僕從
皆醉飽欣欣直心識之至成化十九年六月
以罪調南京御馬監所經有司皆避直困臥
公館孤燈熒然適恭以公事至直喜求食恭
以所携設饌遂爾汝待之直曰吾非復前比
矣明發得車馬起程足矣恭曰諾至明趨騎

而去聲勢寂然小人得喪之態可爲世戒
○故事章奏旣得旨諸司抄出奉行亦互相傳
報使知朝政自成化時汪直用事其黨千戶
吳綬以爲漏洩機密請禁之後之奸人恐不
便已私遂往往禁諸傳報者然卒未有不傳
亦可笑矣

○成化二十年 英宗忌辰

憲宗顧左右曰今早行禮之際追念罔極之恩
感傷於懷泫然淚下不能自己永惟

先皇奄棄天下臣民忽已二十年矣朕嗣守大業兢兢慄慄恒懼弗克負荷無以慰

宗廟神靈今益當省身脩德任賢圖治使四海無虞生民樂業庶幾無愧天子之孝云爾

○慶成大禮國家以來不肯輕廢成化二十年正月御史徐鏞何珖以京師地震疏請免宴憲宗謂慶成宴乃祖宗定制責二人不諳大體調外任

○成化間京城內外奸惡之徒行兇害人荒淫

賭博甚至占人妻女爲人報讐

憲廟因錦衣衛官奏謂之曰昔漢郭解一豪俠之雄耳武帝因公孫弘之言殺之以懲不逞論者謂其有關治體今羣惡少相倚爲奸恐將來效尤者無所不至宜榜禁之仍令保伍互相覺察知而不告者各治以罪

成化二十一年五月陞御史汪奎於夔州府都給事中盧瑀于長沙府各通判給事中童祝於興國州秦昇於廣安州各同知諸人因

災異言事切直吏部承密旨陞之亦陞遷之
變例也

○成化二十一年九月忽一日申刻太監覃昌
傳旨召大學士萬安劉吉赴西角門劉珝亦欲
往昌止之安等至昌出紙一緘上有御筆朱
書一封字啓視則人訐珝貪財好色與太監
某認親納王越賄謀與復爵諸陰事安等驚
曰此卽匿名文書朝廷何不火之召安等看
何爲昌曰 聖意不可回二先生不作計處

明旦行事本發出則無及矣安等曰必不得已翊親老俟親終守制何如曰不能待也曰不然令其自陳休致厚加恩典以全君臣始終之義昌曰上意正如此翌日翊本進遂准致仕加歲夫月米賜勅而遣之

○每視朝時天威在上羣臣敬慎之極語言進退之間不無小小差誤非敢慢也成化二十二年四月

憲廟諭御史等官今後通政司鴻臚寺等官宣

讀奏詞有差錯一二字者免劾真聖人之度也

○副都御史屠濬歷三品俸二年餘四月陞右都御史又歷二品俸八月疏乞以今所歷足前所歷共計三年請給三品誥命以封父母許之

○成化二十二年九月詔天下有司徵稅毋取餘價

○舊例會試舉人以百名爲率南數取五十五

名北數取三十五名中數取十名成化二十二年十一月當會試之前時內閣萬安禮部尚書周洪謨俱四川人四川左布政潘稹卽希二人意言額數不均於是南北各退二名中卷多增二名

○成化二十三年二月初七日上丁當祭先師孔子以初六日命皇太子親迎傳制遣官改用次丁

○成化二十三年五月保定府束鹿縣昏刻天

地昏黑空中聲如雷尋有黑氣墜地掘之得黑石二一如硨磲一如雞卵

○成化二十三年八月寧王奠培以皇太子婚禮成遣官表賀其表文中稱大婚

憲廟言婚禮不賀人之序也今庶民之家尚不行此況朝廷乎王不據理遵例乃遣人奉表來賀雖云致敬所謂事之不以禮也況表中又不審輕重謬稱大婚可乎宜降勅諭王俾知此意仍令巡按御史逮治長史等官

○成化時真定知府余瓚言陝西山西大同宣府遼東等處邊牆內地土肥饒近皆爲鎮守內外等官私役軍士盡力開耕所獲糧草甚富凡遇官民買納加倍取息以此觀之則各邊所出者皆足各邊之用矣請勅遣科道部屬官剛正有爲深達大體者數員往會巡撫巡按鎮守內外等官勘視凡堪種熟地係軍民并千百戶以下者聽如舊管業其在指揮以上者請定則例量撥多寡以資其用餘皆

計常撥官軍若干隊分撥每人宅地二畝田地二十畝每隊分爲兩班耕守以備征操亦但徵取十一則民可免轉輸之勞軍可無饑寒之苦矣

○京城外有軍民葉玘斬鸞等發人墓取髑髏及頂骨以爲葛巴刺碗并數珠假以爲西番所產乘時市利愚民競趨之所發墓甚衆至是緝事者聞于朝番僧嘗買以進者皆遁去獲玘等送刑部鞠治得其黨俱坐斬

○成化末貴州總兵吳經巡撫都御史謝昶奏
苗賊糾衆稱王敵殺官軍聲言入犯其勢甚
熾若不調兵剿之貴州難保無虞兵部言苗
賊果如經等所奏固當致討但詳諸臣奏詞
不見殺掠實數宜遣官按視於是遣御史鄧
庠兵部員外費瑄賜勅諭以上體朝廷好生
之心下念生民煩費之苦勿據偏詞輕調大
兵以邀功啓釁庠瑄至貴州苗實無稱王諸
狀第稍侵我田土守臣希覲陞賞皆主用兵

之議又出危言以劫持二人二人不從遂招撫苗衆苗知朝廷無剿除之意各出聽撫諭兵竟不用而還

皇明典故紀聞卷十五

終